




Ամենայն Հայոց կաթողիկոս Ս. Ս. Վազգեն Ա Հայրապետը, ընդառաջելով Ամերիկայի Միացյալ Նահանգների արևելյան և արևմտյան թեմերի հայոց թեմակալ առաջնորդներ Ս. Թորգոմ և Ս. Վաչե արքեպիսկոպոսների, Կանադայի հայոց նորակազմ թեմի առաջնորդ Ս. Վազգեն արքեպիսկոպոսի հրավերներին, հովվապետական այցելություն տվեց Միացյալ Նահանգների և Կանադայի հայկական եկեղեցական համայնքներին ի Նյու Յորք, Վաշինգտոն, Բոստոն, Դետրոյտ, Լոս Անջելոս, Սան Ֆրանցիսկո, Ֆրեզնո, Տորոնտո և Մոնրեալ՝ անձամբ տանելով Մայր Աթոռ Ս. Էջմիածնի կենսարար օրհնությունը Սփյուռքի հեռավոր ափերին ապրող իր բոլոր հոգևոր զավակներին՝ համրապնդումն մեր նախնյաց սուրբ հավատքի, Հայաստանյայց Առաքելական Եկեղեցու սիրով միության և ազգային միասնականության:

Վեհափառ Հայրապետի հմայիչ անձնավորության և հեղինակության մեջ հայ ժողովրդի տարապիտո զավակները շրջափեղծ են մարմնացած տեսան Մայր Աթոռ Ս. Էջմիածինն ու վերածնված Մայր Հայրենիքը և շուրջ երկու ամիս ապրեցին հոգևոր և ազգային ճշմարիտ հպարտության և ցնծության օրեր:

Ամենայն Հայոց Հայրապետի սույն ուղևորությունը պատմական մեծ իրադարձություն հանդիսացավ՝

ա. Հոգևոր-եկեղեցական կյանքի շինության և ազգային գիտակցության արթնացման իմաստով.

բ. Միջեկեղեցական հանդիպումների մակարդակի վրա էկումենիկ ոգու ամրապնդման իմաստով, և՝

գ. Պետական լայն շրջանակների մեջ:

Այս առթիվ Վեհափառ Հայրապետին ողբկցում էին Մայր Աթոռի դիվանապետ Ս. Ներսես արքեպիսկոպոս Պողոսյանը և Մայր Աթոռի միաբան Ս. Նավասարդ արեղա Կոչանը՝ որպես գավազանակիր:

Նորին Սրբությունը իր մեկնումից առաջ հարցազրույց ունեցավ «Հայրենիքի ձայն» շաբաթաթերթի թղթակցի հետ (տես «Էջմիածին» ամսագիր, 1987 թ., № № ԺԱ—ԺԲ, էջ 3):



ՄԵԿՆՈՒՄ ԷԶՄԻԱԾՆԻՑ

1987 թվականի հոկտեմբերի 5-ին, երկուշաբթի, առավոտյան ժամը 11-ին, Վեհափառ Հայրապետը եկեղեցական թափորով առաջնորդվում է Միածնաէջ Մայր տաճար: Քաղցրահնչուն դողանքում են Մայր տաճարի զանգերը:

Ողջ միաբանությունը աղոթում է Իջման ս. սեղանի առջև Նորին Արքրության բարեհաջող, խաղաղ և ապահով ուղևորության համար: Աղոթում է նաև Վեհափառ Հայրապետը:

Աղոթքից հետո Մայր Աթոռի միաբանների անունից Վեհափառ Հայրապետին և նրա շքախմբի անդամներին բարի ճանապարհ է մաղթում Գերագույն Հոգևոր Խորհրդի ատենապետ Տ. Սիոն արքեպիսկոպոս Մանուկյանը:

Հայոց Հայրապետը, իր օրհնությունները տալուց հետո Մայր Աթոռի միաբանությանը, ավտոմեքենաների շարասյան ուղեկցությամբ, ուղևորվում է դեպի Երևանի «Զվարթնոց» օդանավակայան, որտեղ Նորին Արքրությանը ճանապարհելու համար եկել էին Գերագույն Հոգևոր Խորհրդի անդամները, Մայրավանքի միաբանությունն ու պաշտոնեությունը:

Օդանավակայանում Վեհափառ Հայրապետին բարի ճանապարհ են մաղթում նաև ՀՍՄՀ Միհիստրների խորհրդին առընթեր Հայ Եկեղեցու գործերի խորհրդի նախագահ տիար Ստեփան Վարդանյանը և տեղակալներ Անդրանիկ Հասրաթյանն ու Ռաֆիկ Զարգարյանը:

ԺԱՄԱՆՈՒՄ ՄՈՍԿՎԱ

«Զվարթնոց» օդանավակայանից ինքնաթիռը ուղղություն է վերցնում դեպի Մոսկվա: Երկու և կես ժամ տևող բարեհաջող թռիչքից հետո օդանավը վարելք է կատարում Մոսկվայի «Վնուկովո» օդանավակայանում, որտեղ Նորին Սրբությանը դիմավորում և բարի գալուստ են մաղթում Ռուսաստանի և Նոր Նախիջևանի հայոց թեմի առաջնորդական տեղապահ Տ. Տիրան վարդապետ Կյուրեղյանն ու Ռուս Պրավոսլավ Եկեղեցու Բեռլինում պատրիարքական պատվիրակ Նիկոլայ արքեպիսկոպոսը:

Հայոց Հայրապետին դիմավորելու համար օդանավակայան էր եկել նաև ՍՍՀՄ Մինիստրների խորհրդին առընթեր կրոնական գործերի խորհրդի աշխատակից Սերգեյ Կուզնեցովը:

Այնուհետև Վեհափառ Հայրապետը առաջնորդվում է «Կոսմոս» հյուրանոց:

Հաջորդ օրը, հոկտեմբերի 8-ին, Վեհափառ Հայրապետը «Կոսմոս» հյուրանոցի իր հարկաբաժնում ընդունում է Մոսկվայում հրատարակվող «Նովոյե վրեմյա» («Նոր ժամանակ») շաբաթաթերթի (որը լույս է տեսնում ռուսերեն, ֆրանսերեն, ալգերեն, գերմաներեն, իսպաներեն, պորտուգալերեն, իտալերեն, լեհերեն, չեխերեն լեզուներով) թղթակից Եվգենի Անդրիանովին: Վեհափառ Հայրապետի հարցազրույցը լույս տեսավ վերոհիշյալ շաբաթաթերթի Ըոյեմբեր ամսի 43-րդ համարում (տես «Էջմիածին» ամսագիր, 1987 թ., № № ԺԱ—ԺԲ, էջ 6):

Հոկտեմբերի 9-ին, ուրբաթ օրը, Վեհափառ Հայրապետը իր շքախմբով «Կոսմոս» հյուրանոցից տեղափոխվում է «Սովետսկայա» հյուրանոց:

Նույն օրը Հայոց Հայրապետը ենթարկվում է բժշկական քննության՝ մի քանի օրերից ի վեր համեցող հոդացավերի պատճառով:

ՄԵԿՆՈՒՄ ՄՈՍԿՎԱՅԻՑ

Հոկտեմբերի 14-ին, չորեքշաբթի օրը, առավոտյան ժամը 9-ին, Վեհափառ Հայրապետը իր շքախմբով Մոսկվայի «Շերեմետևո—2» միջազգային օդանավակայանից ուղևորվում է Նյու Յորք:

Այս առիթով Հայոց Հայրապետին և նրա շքախմբի անդամներին ճանապարհելու համար օդանավակայան էին եկել ՍՍՀՄ Մինիստրների խորհրդին առընթեր կրոնական պաշտամունքների խորհրդի նախագահի տեղակալ տիար Ն. Կուզնեցովը, Ռուսաստանի և Նոր Նախիջևանի հայոց առաջնորդական տեղապահ Տ. Տիրան վարդապետ Կյուրեղյանը, եկեղեցական խորհրդի անդամներ և հավատացյալներ:

Նյու Յորք մեկնման ճանապարհին ինքնաթիռը կարճ դադար է ունենում Արևմտյան Գերմանիայի Ֆրանկֆուրտ-ամ-Մայն քաղաքում:

